



MASUK PENJARA: Bibi (kiri) dibawa keluar dari bilik mahkamah sejurus penjatuhan hukuman semalam.

Ibu abai dan dera anak dipenjara lima tahun

SIBU: Mahkamah Sesyen di sini, semalam menjatuhkan hukuman penjara lima tahun ke atas seorang wanita kerana mengabaikan dan mendera anak kandungnya sendiri.

Bibi Narcessus Dryddeen Jitai, 45, dari Sarikei mengaku bersalah di hadapan Hakim Mahkamah Sesyen Musyiri Peet atas tiga pertuduhan di bawah Seksyen 31(1)(a) Akta Kanak-Kanak 2001.

Seksyen itu membawa hukuman denda maksimum RM50,000 atau penjara sehingga 20 tahun atau kedua-duanya jika sabit kesalahan.

Bibi pertama kali didakwa atas tuduhan mengabaikan anak perempuannya yang berusia 14 tahun dengan menghalaunya keluar dari rumah mereka pada 15 Ogos kira-kira jam 6 petang.

Bagi pertuduhan kedua, dia didakwa mendera secara fizikal anak lelakinya yang berusia 11 tahun menggunakan kayu penyapu pada 15 Ogos kira-kira jam 1.30 petang.

Dia juga didakwa melakukan penderaan fizikal terhadap mangsa yang sama dengan didakwa melecurkannya dengan air mendidih pada 20 Oktober lalu kira-kira jam 5 petang.

Ibu abai dan dera anak dipenjara lima tahun

► Dari Muka 1

Kesalahan itu dilakukan di sebuah rumah di Jalan Pahlawan di sini.

Musyiri menjatuhkan hukuman penjara lima tahun bagi tiga pertuduhan itu terhadap Bibi.

Beliau turut mengarahkan hukuman itu berjalan serentak mulai tarikh penjatuhan hukuman semalam.

Berdasarkan fakta kes, polis menerima maklumat daripada kakitangan Talian Kasih mengenai dua kanak-kanak didera ibu kandung dan bapa tiri mereka di sebuah rumah di Jalan Pahlawan di sini pada 3 November lalu.

Bertindak atas maklumat itu, polis pergi ke lokasi untuk menyiasat dan mendapati tertuduh telah mengabaikan anak perempuannya di bawah umur dan mendera anak lelakinya secara fizikal.

Siasatan polis juga mendedahkan bahawa salah seorang mangsa menghubungi Talian Kasih untuk membuat laporan.

Dalam mitigasinya, Bibi yang tidak diwakili peguam bela merayu hukuman ringan kerana usianya dan status menganggur.

Timbalan Pendakwa Raya Adriana Maisarah Mohd Farid memohon mahkamah menjatuhkan hukuman setimpal sebagai pengajaran kepada tertuduh dan orang ramai.